

Toja

I.

Si·m fos Amors de ioi donar tant larga
cum ieu vas lieis d?aver fin cor e franc,
ia per gran ben no·m calgra far embarc,
q?er am tant aut qe·l pes mi poi? e·m tomba,
mas qand m?albir cum es de pretz al som
mout m?en am mais car anc l?ausiei voler,
c?aras sai ieu que mos cors e mos sens
mi farant far, lor grat, rica conquesta.

II.

Pero s?ieu fatz lonc esper, no m?embarga,
q?en tant ric luoc me sui mes e m?estanc
c?ab sos bels digz mi tengra de ioi larc
e segrai tant q?om mi port a la tomba,
q?ieu non sui ies cel que lais aur per plom;
e pois en lieis no·s taing c?om ren esmer,
tant li serai fis e obediens
tro de s?amor, si·l platz, baisan m?envesta.

III.

Us bons respieitz mi reven e·m descarga
d?un doutz desir don mi dolon li flanc,
car en patz prenc l?afan e·l sofr? e·l parc
pois de beutat son las autras en comba,
que la gensser par c?aia pres un tom
plus bas de liei , qui la ve, et es ver;
que tuig bon aip, pretz e sabers e sens
reingnon ab liei, c?us non es meins ni·n resta.

IV.

E pois tan val, no·us cuietz que s?esparga
mos fermes volers ni qe·is forc ni qe·is blanc,
car no serai sieus ni mieus si m?en parc,
per cel Seignor qe·is mostret en colomba,
q?el mon non ha home de negun nom
tant desires gran benanans? aver
cum ieu fatz lieis, e tenc a nonçalens
los enoios cui dans d?Amor es festa.

V.

Na Mieills·de·ben, ia no·m siatz avarga,
q?en vostr?amor me trobaretz tot blanc,

q?ieu non ai cor ni poder qe·m descarc
del ferm voler que non es de retomba;
que qand m?esveill ni clau los huoills de som
a vos m?autreï, qan leu ni vau iazer;
e no·us cuïetz qe·is merme mos talens,
non fara ies, q?ara·l sent en la testa.

VI.

Fals lausengier, fuocs las lengas vos arga,
e que perdatz ams los huoills de mal cranc,
que per vos son estraich cavail e marc:
amor toletz, c?ab pauc del tot non tomba;
confonda·us Dieus que ia non sapchatz com,
qe·us fatz als drutz maldire e viltener;
malastres es qe·us ten, desconoissens,
que peior etz, qui plus vos amonesta.

VII.

Arnautz a faitz e fara loncs atens,
q?atenden fai pros hom rica conquesta.

- letto 720 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/toja-13>